

**Ummannap talittarfiani aserfallatsaaliuisoqarnissaa ujaqqanillu nunniukkamik  
malinnut illersuusiortoqarnissaa pillugu AIS 19-imut salliutitseqqullugit  
Naalakkersuisut peqquneqarnissaannik Inatsisartut aalajangiiffigisassaattut  
siunnersuut**

*(Saqq.: Inatsisartunut ilaasortaq, Jess Svane, Siumut)*

**pillugu**

**Sanaartornermut ataatsimiititaliap**

**ISUMALIUTISSIISSUTAA**

**Siunnersuutip aappassaaneerpeqarneranut tunniunneqartoq**

Suliarineqarnerani ataatsimiititaliaq ukuninnga inuttaqarpoq:

Inatsisartunut ilaasortaq Bendt B. Kristiansen, Inuit Ataqtigiit, siulittaasoq  
Inatsisartunut ilaasortaq Jens-Erik Kirkegaard, Siumut, siulittaasup tullia  
Inatsisartunut ilaasortaq Pitsi Høegh, Siumut  
Inatsisartunut ilaasortaq Jess Svane, Siumut  
Inatsisartunut ilaasortaq Villy Olsvig, Inuit Ataqtigiit

UKA 2017-ip nalaani ull. 11. Oktober 2017 siullermeerereermermi siunnersuut  
ataatsimiititaliamit misissorneqarpoq.

**1. Siunnersuutip imaa siunertaalu**

Ummannap talittarfiani aserfallatsaaliuisoqarnissaa ujaqqanillu nunniukkamik malinnut  
illersuusiortoqarnissaa pillugu 2019-imut Aningaasanut Inatsisissatut siunnersuummi  
salliutitseqqullugit Naalakkersuisut peqquneqarnissaat siunnersuummi siunertarineqarpoq.

**2. Siunnersuutip Inatsisartuni siullermeerneqarnera**

Ummannap talittarfiani aserfallatsaaliuisoqarnissaanut malinnullu illersuusiortoqarnissaanik  
pisariaqtitsineq Inatsisartuni siamasissumik tapersorneqarpoq.

Umiarsualivinnut pilersaarummi umiarsualiviit pillugit suliniutit aallartinnissaannut  
Naalakkersuisut sumut killissimanersut siullermeerinermermi apeqqtigineqarpoq, kiisalu

Uummannap pingaarnersiulluni allattukat aappaaniiginnartinneqarnissaanik Naalakkersuisut attassiinnarniarnersut apeqqutigineqarluni.

Isummersornermi apeqqutinut akissutit tapiliunneqarput, takuuk Ilanngussaq 1.

Uummannap talittarfiani aserfallatsaaliuisoqarnissaa ujaqqanillu nunniukkamik malinnut illersuusiortoqarnissaa pillugu AIS 19-imut salliutitseqqullugit Naalakkersuisut peqquneqarnissaannut taarsiullugu immikkoortup siullermeerneqarnerani Naalakkersuisunit allannguutissatut siunnersuut una saqqummiunneqarpoq:

**”Sanaartornermut aningaasartuutit ukiuni tulliuuttuni aningaasanut inatsisissani tullerriiaarinermit ilanngunneqarnissaat siunertaralugu Naalakkersuisut qinnuigineqassapput, piaartumik Uummannami umiarsualiveqarfimmi iluarsagassanut anorimullu oqqiorfinnik pisariaqartitanik misissueqqullugit taakkunanilu suliaassanik tullerriiaareqqullugit.”**

### **3. Siunnersuutip ataatsimiititaliamit suliarineqarnera**

*Umiarsualivinnut Immikkoortumut pilersaarut Kalaallit Nunaanni 2016 – 2026* tusarniaassutaasoq aamma immikkoortumut pilersaarutip suliarineqarneranut periaaseq tunngaviusoq ataatsimiititaliap misissorpai. Isummersornermittaaq apeqqutigineqartunut Naalakkersuisunit akissutit aamma allannguutissatut siunnersuut ataatsimiititaliap misissorpai.

Periaaseq aamma akissutigineqartut ataatsimiititaliap naammagisimaarpai.

Inatsisartuni isummersornerit tunngavigalugit ataatsimiititaliap paasivaa, inuussutissarsiutigalugu imaatigut angallatinut isaterinermit tapiissutit atugassaasimagaluartunit ukiuni arlaqartuni atuinngitsoortoqartarsimasoq.

Isaterinissamut aningaasaliissutit atorneqartanninneranni angallatit angallatillu umiusimasut sooq amerliartuinnarnerat ataatsimiititaliap taamaalilluni eqqumiigaa.

Tamanna tunngavigalugu ataatsimiititaliap kaammattuutigaa, pineqartumi malittarisassat nalilersoqqittariaqartut, isaterinernullu aningaasaliissutit umiarsualivinnik aserfallatsaaliinermit nutarterinernullu immaqa nuunneqarlutik.

### **4. Siunnersuutip aningaasatigut kingunissai**

Inatsisartut Suleriaasianni § 33, imm. 1-imi takuneqarsinnaavoq, aalajangiiffigisassatut siunnersuutip piviusunngortinnerani siunnersuutip tunngavilersuutitaani aningaasatigut allaffissornikkullu kingunerisassai allaaserineqarsimassasut.

Ataatsimiititaliap paasivaa, tamanna naapertorlugu siunnersuutip piviusunngornerani aningaasatigut kingunissai taaneqarsimasut, taamaalillunilu tassaarsuaqarnerani sinerissami isumannaarinissamut 2013-imi pingaarnertut missingersuutit C-t Namminersorlutik Oqartussanit inniminneerreqarsimasut.

Siunnersuummi ilaatinneqarput malissuit pilertut umiarsualivimmi annikillinissaannut ilulissanillu aserortunit mallit annikillinerunissaannut oqqiorfik nunniugaq. Sanaartoriaaseq immallu itissusia apeqqaataallutik sanaartornermut akissaaajaatit kr. 15-20 mio.-iunissaat missingiusiarineqarsimavoq.

Umiarsualivinnut talittarfinnullu 2017-imut Aningaasanut Inatsimmi kr. 25,7 mio.-it aningaasaliissutigineqarsimapput, ukiunullu missingersuusiorfiusunut 2018-2019-imut kr. 25,2 mio.-it immikkoortinneqarsimallutik.

Taamaattorli siunnersuuteqartoq isumaqarpoq, konto 87.73.10 aamma 87.73.12 Umiarsualivinnut talittarfinnullu aningaasaliissutit (Sanaartornermut aningaasaliissutit) atorlugit pilersaaruserneq aamma sanaartorneq aningaasalersorneqarsinnaasoq.

Siunnersuuteqartutaaq oqaatigaa, akissaaajaanut Namminersorlutik Oqartussat akiliutai annikillisinneqarsinnaasut Umiarsualiviit pillugit Inatsisartut Inatsisaanni nr. 9-mi, 3. Juni 2015-imeersumi § 16 atorneqartuuppat, tassani allassimammat umiarsualivinnik ingerlatseqatigiiffiit umiarsualiviup nunami atortulersuutitallip atorneqarnerannut akiliutinik akiliuteqartitsinnaasut. Tassunga atatillugu Sanaartornermut ataatsimiititaliap malugaa, umiarsualiviit pillugit inatsimmi § 16-imi piumasaqaataammat umiarsualivik pillugu ingerlatseqatigiiffimmik pilersitsinissaq, kiisalu taanna umiarsualivimmik piginnittuulissasoq. Taamaattorli umiarsualivimmik nunami atortulersuutitallip atorneqarnerani inatsimmi tassani § 21 malillugu akiliuteqarnissamik piumasaqarnissamut Naalakkersuisut toqqaannartumik inatsisitigut tunngavissaqarput.

UPA 2015/73-imut Sanaartornermut ataatsimiititaliap isumaliutissiisutaani atuarneqarsinnaavoq, 1992-imi taamanikkut Inatsisartuusut umiarsualivinnut akitsuuteqartitsineq atortussanngortissimagaat, tassanilu taaneqarsimasoq, umiarsualivinnik annertunerpaamik atuisut tassaasariaqartut umiarsualivinnik allanngortiterinissat allilerinissallu aningaasalersornissaanni annertunerpaamik nammatassinneqartussat.

Taamaattumik Kalaallit Nunaanni Umiarsualivinnut Immikkoortumut pilersaarummi paasissutissat pissarsiarineqarsinnaasut tunngavigalugit Uummannami umiarsualiviup nutarteratarsinnaanera kr. 15-20 mio.-t missaaniittussatut nalilerneqarpoq.

Tunngaviatigut sanaartornermut pilersaaruserneq Namminersorlutik Oqartussanut aningaasatigut annertuumik kinguneqarnavianngilaq, taamaattorli AC-mik sulisitat

minnerpaamik ukiumi ilivitsumi sulisinneqarnissaa naatsorsuutigisariaqarpoq. Atortussat naammassiat nutserneri ilanngullugit kr. 450.000-t missaanik tamanna akeqassaaq. Tamatumani pilersaarusiornermut akissajaatit ilanngunneqanngillat. Akissajaatit attuumassutillit saniatigut pilersaarusiornikkut sanaartornermut akissajaatissat ikilisissavai, taakkulu missingersuusiani C-ni kr. 15-20 mio.-nut tagginneqarnikuupput.

Akissuteqaammi siunnersuutip aningaasatigut kingunissai pillugit Naalakkersuisut allatut naliliisimanersut akissuteqaammi takuneqarsinnaanngilaq, taamaalillunilu Sanaartornermut ataatsimiititaliaq allatut naliliinissamut pissutissaqanngilaq.

### **5. Ataatsimiititaliap inassutai**

Ataatsimiititaliap maluginiarpaa, umiarsualiviit pillugit inatsit atuuttoq atorlugu siunnersuutaasumut tamakkiisumik ilaannakortumilluunniit aningaasalersuinissamut Naalakkersuisut inatsisitigut tunngavissaqartut. Ataatsimiititaliap maluginiarpaattaaq ukiuni arlalinni isaterinermut tapiissutinit annikinnerusumik atuisoqarsimasoq, taakkulu pingaarnersiulluni nikisiterinikkut umiarsualiveqarnermut atorsinnaassasut.

Qulaani oqaatigineqartut tunngavigalugit naalakkersuisunit allanguutissatut siunnersuutigineqartoq akuerineqassasoq ataatsimiititaliap **isumaqatigiittup** inassutigaa.

Taamatut oqaaseqarluni isumaliutissiisummilu allassimasutut paasinnilluni ataatsimiitaliap siunnersuut aappassaaniigassanngortippaa.



Bendt B. Kristiansen,  
Siulittaasoq



Jens-Erik Kirkegaard,  
Siulittaasup tullia



Jess Svane



Pitsi Høegh



Villy Olsvig